



Sesida dals

Communitgà ils

Protocol nr.

15 d'october 2019

18 d'october 2019

759

Dumonda Cavegn

concernent la concepziun da graubündenSPORT sco uffizi da sport

Resposta da la regenza

Er la regenza grischuna è da l'avis ch'il sport e las activitads sportivas sajan da gronda impurtanza en il Grischun. Il sport procura per valurs impurtantas en la societad. Il sport collia generaziuns, culturas e promova la cuminanza. Il sport encuraschescha, promova la communicaziun, la solidaritad e l'entusiassem per ina chaussa cuminaivla. Il sport promova la sanadad. Il sport è er ina part da nossa cultura ed è ultra da quai in aspect economic e turistic impurtant da noss chantun.

Cun stgaffir la lescha davart la promoziun dal sport e dal moviment (lescha davart la promoziun dal sport; DG 470.000) ha la regenza gia tegnì quint l'onn 2015 dal fatg fundamental che l'impurtanza politica dal sport è creschida. Cun il concept per promover il sport, ch'è vegnì elavurà suenter ensemen cun las federaziuns da sport e ch'è per gronda part realisà en il fratep, han ins obtegnì ulteriuras meglieraziuns per il sport grischun. La diversitad e la dimensiun da las incumbensas ch'il chantun ademplescha en il sector dal sport, èn pia creschidas tras quai. Las mesiras da promoziun da l'anterior "uffizi da G+S" èn vegnidas amplifitgadas pass per pass durant ils ultims onns ed èn daventadas pli multifaras e pli pretensiusas. Exempels èn l'engrondiment marcant da la promoziun da centers da prestaziun, l'introducziun da las scolas da talents e dal sport da scola voluntar sco er il cumenzament dal program da manaders 1418.

Il champ d'activitads da graubündenSPORT è s'extendì pli e pli sin differents secturs laterals, confurm a la chapientscha moderna dal sport. Exempels èn la collavuraziun

cun auters uffizis da furmaziun, la garanzia da spazi per il sport e per il moviment, la cumpatibilitad dal sport cun l'ambient u tematicas dal dretg da lavur en connex cun l'engaschament da trenadras e da trenaders.

Ma la regenza è er da l'avis che la structura d'organisaziun e da direcziun dal departament d'educaziun, cultura e protecziun da l'ambient (DECA), ch'è vegnida definida avant 16 onns, saja sa cumprovada er ord vista actuala, e che la partiziun "sport" sa posiziuneschia gia fitg autonomamain tras il diever da la marca grau-bünden. La declassificaziun ad ina partiziun, che ha già lieu l'onn 2003, e l'integraziun en l'uffizi per la scola populara ed il sport n'ha betg restrenschi il svilup dal sport grischun, er betg ord vista finanziaria. Ils custs totals èn numnadamain s'augmentads pass per pass dad 1,7 milliuns francs da quella giada sin 2,5 milliuns francs dad oz. Tras la revisiun totala da la lescha davart las scolas popularas dal chantun Grischun (lescha da scola; DG 421.000) èn vegnids vitiers ulteriurs pajaments da contribuziuns a scolas da talents en la dimensiun dad actualmain 0,7 milliuns francs. La partiziun "sport" è cumpetenta per las scolas da talents, sustegna la furmaziun supplementara da las persunas d'instrucziun da sport e procura – ensemen cun las cussegliastras ed ils cussegliastrs da gimnastica – per l'organisaziun dals examens da sport da scola. L'attribuziun al sector da furmaziun correspunda er a l'organisaziun dal sport naziunal, perquai che la conferenza da las incumbensadas e dals incumbensads chantunals da sport è ina conferenza spezialisada da la conferenza svizra dals directurs chantunals da l'educaziun publica. Medemamain stoi vegnir constatà expressivamain che l'organisaziun da l'administraziun è ina incumbensa permanenta da la regenza. Cun il conclus da la regenza dals 28 da matg 2019 (prot. nr. 401) ha la regenza decidì da far in'examinaziun cumplessiva da las incumbensas e da las prestaziuns. En il rom da questa examinaziun vegni er intercuri, sch'i duai vegnir stgaffi in uffizi da sport.



En num da la Regenza

Il president:

Il chancelier:

Dr. Jon Domenic Parolini

Daniel Spadin